

Kontuola

ANTZUOLA / Egubakoitza / 2003eko urriaren 17a / 174. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Webgunea bihar, zapatua, aurkeztuko du Udalak

AINZANE IRIZAR

Olaran etxeko areto nagusian egingo dute Udalaren webgunearen aurkezpen ekitaldia bihar, zapatua, 12:00etan. www.antzuela.com helbidean jarri dute gune hori; besteak beste, herriko ekitaldien eta oharren berri emango dute orri nagusian.

Internet azkenaldian hartzen dabilen indarra ikusita, Udalak aspalditik zuen webgunea egiteko asmoa. Azkenean, sarean dugu Antzuolaren gaineko informazioa eskaintzen digun webgunea.

Udaleko arduradunen helburua da bai herritarrengana eta bai kanpotarrengana iristea.

Herritarren kasuan, herriko hainbat berriren, oharren eta egongo diren ekitaldien berri emateko, batez ere. Bestalde, webgunearen bitartez Udalarekin harremanetan jartzeko aukera izango dute herritarrek: dirulaguntzen berri jasotzeko, eskaerak egiteko, eta abarerrako.

Kanpokoendako, berriz, beharbada interesgarriagoak izango dira herriko artea, historia eta jaien gaineko atalak, esate baterako.



Udalaren eta herriaren gaineko informazio zabala jasoko du webguneak.

KZGUNEAK BISITATUKO DUTE

Aurkezpen ekitaldian, bide batez, KZGunearen berri emango dute, gune horren erabilpena bultzatzeko. Olaranen dago KZGunea, eta aurkezpenaren ondoren bertan nabigatzeko aukera egongo

da. Horrela, herritarrek www.antzuela.com bertatik bertara ezagutu ahal izango dute.

Gogora ezazue astelehenean egubakoitzera 16:00etatik 20:00etara egoten dela zabalik KZGunea.

Liburutegian umeen tailerra

Tailer polita antolatu zuen Udal Liburutegiak aurreko egubakoitzean. Jose Luis Padron idazlearekin batera, Antzuolako gida egin zuten eskolako neska-mutikoei.

Imajinazioa, margoak eta lapitzak nahiko izan zituzten umeek Antzuolaren gaineko euren ikuspegia paperean islatzeko.

Datorren asteko zapatuan, berriz, hilak 25, ipuin kontalaria etorriko da Udal Liburutegira. Arratsaldeko seietan izango da emanaldi hori. /A.I.

EUSKARA

Badihardugurekin hitzarmena egin dute

A.I.

Deba ibarreko Badihardugu euskara elkartearekin hitzarmena egingo du Antzuolako Udalak; horixe erabaki zuen udalbatzak urriko osoko bilkuran. Hitzarmen horren helburua da datozen bi urteotan herriko ahozko hizketaren ondarea jasotzea.

Badihardugu euskara elkarteak ahozko hizketa jasotzeko proiektua aurkeztu dio Udalari eta hori aurrera eramateko hitzarmena egitea proposatu. Udalak onartu egin du proposamena eta datozen bi urteotarako 8.400 euro ordainduko dizkio Badihardugu elkarteari lan hori egiteagatik.

Azkeneko urteotan, bai Antzuolan eta bai inguruko hainbat herritan bertako euskararen

gaineko azterketa ugari egin dituzte. Gurean, esaterako, herriko euskararen gaineko lan mar-dula egin zuen Jone Larrañagak, Udalak ematen duen Antzuola Herria Ikerketa Bekari esker. Lan hori egiteko oinarrietako bat herriko jende nagusiarekin egingo elkarriketak izan ziren.

Proiektu honetan, Badiharduguren lana izango da eginda dauden grabaketa guztiak jaso, zerrendatu, digitalizatu eta ondo sailkatzea. Behin lan hori egin da, herritar guztiendako eskuragarri jarriko dituzte grabaketa horiek. Horrez gainera, grabaketa gehiago ere egingo dituzte, bideoan.

Deba ibarreko hainbat herritan egingo dute Badihardugu elkartearekin lan hori; gero, zinta guztiak bildu eta Ahozkotasunaren Bilduma osatu nahi dute.

LABUR

EAJ-EAko Gurutz Madariagak zinegotzi kargua hartu zuen urriko osoko bilkuran

Maiatzeko hauteskundeak eta gero, ekainaren 14an egin zuten udalbatza berria osatzeko osoko bilkura. Hantxe, EAJ-EAko bost zinegotzik hartu zuten kargua, nahiz eta emaitza ofizialen arabera zortzi zinegotzi lortu zituen koalizioak. Kargurik hartu ez zuen hiru horietako batek, Gurutz Madariagak, hain zuzen ere, urriko osoko bilkuran hartu zuen kargua.

Eskulan ikastaroan ibilitakoen lanekin erakusketa egingo dute asteburuan

Aurreko ikasturtean eskulan ikastaroan ibilitakoen lanak jarriko dituzte ikusgai Olaran etxean bihar, zapatua, eta etzi, domeka. 12:00etatik 14:00etara eta 18:30etik 20:00etara egongo da zabalik erakusketa. 15 bat lagun lanak jarriko dituzte: hariz egindakoak, pintura lanak, mosaiko lanak, margolanak...

Pikunieta baserriko eta Irumendi elkarteak baserriak irabazle Elosun

Aurreko domekan Elosun izandako mendiko ganadu ferian antzuolarrek hainbat sari irabazi zituzten. Batetik, Irumendi elkarteak pirenaiako arrazako behi onenaren saria jaso zuten; Pikunieta baserrikoek, berriz, ardi onenaren saria eman zieten. Sekula baino ganadu gehiago egon zen Elosun domekan: 200 buru baino gehiago, hain zuzen.



ELKARRIZKETA

MARINA REINOSO/VENEZUELAN EGON DA GOBERNUZ KANPOKO ERAKUNDE BATEKIN

“Arrisku egoeran dauden umeeekin lanean jardun dut Caracasen, Jaurlearitzaren programa baten barruan”

Hiru hilabetez Caracasen (Venezuela) egon da Marina. Umeeekin jardun du, gizarte langile, Atenea fundazioan. Venezuelako bizi izan duen esperientziaren gainean jardun dugu Marinarekin.

Zelan sortu zitzaizun Venezuelara joateko aukera?

Jaurlearitzaren Euskal Gazte Kooperanteak programaren bitartez joan nintzen. Sentsibilizazio programa bat da, eta helburua da gazteok herrialde ez garatuak egoerarekin sentsibilizatzea.

Ni gizarte langilea naiz, eta aurreko ikasturtean Nazioarteko Garapen eta Kooperazioko graduatu ondoko ikasketak egin nituen; ikasitako teoria guztia praktikan jartzeko gogoia nukan. Horrela, Jaurlearitzak eskaintzen zuen programa hori aukera ona iruditzen zitzaidan. Gainera, beste herrialde bat, beste kultu-



“Gauzen ikuspegi zabalagoa izaten laguntzen du era honetako esperientzia batek”

ra bat eta beste jende mota bat ezagutzeko aukera ona zen. Zein izan da zure lana han?

Hiru neska joan ginen Caracasa, eta Atenea fundazioak hiriburu hartan duen egoitzan egin dugu lan. Ateneak arrisku egoeran dauden umeeekin egiten du lan eta 60 ume ditu bere kargura. Ume horiei jaten ematen die fundazioak, baita arropak eman, eskolatu eta zaindu ere. Ume horietako batzuk umezurtzak dira, beste batzuk tratu txarrak jasan dituztenak, eta badira egoera ekonomiko larriagatik gurasoek zaindu ezin dituztenak ere;

izan ere, denetik dago han.

Hemendik joan ginen hiru neskon lana zen laguntza psiko-soziala eskaintzea. Azken baten, gure lana zen ume jakin batzuen egoeraren jarraipena egitea. Zerbitzu horretan gizarte langileok eta psikologoak geunden. Zelan baloratuko zenuke esperientzia?

Oso positiboa izan da; profesionalki beste lan esparru bat ezagutzeko aukera izan dut eta umeeekin lan egiten ikasi dut. Baina, batez ere, pertsonalki izan da aberasgarria esperientzia hau. Gauzen ikuspegi zabalagoa izaten laguntzen du. Kontuan hartu behar da zeharo ezberdina dela herrialdea, bertako biztanleak, pentsatzeko era... Horretara gutzira egokitu behar da, eta horrek eragin handia izan du niregan. Itzultzeko asmorik baduzu?

Venezuelara bertara ez, baina beste herrialderen bat gustura ezagutzeko nuke; esan bezala, oso aberasgarria iruditzen zait beste kultura batzuk ezagutzeko.

KIROLA

PARTIDUAK

FUTBOLA

Urriak 18
12:00: Antzuola-Urki (Kadeteak)

PILOTA

Oraingo asteburuan kanpoan jokatuko dituzte partiduko guztiak

EMAITZAK

FUTBOLA

Antzuola 1 Lagun Onak 2 (2. erreg.)
Antzuola 1 Tolosa 2 (Gazteak)
Bergara 9 Antzuola 3 (Kadeteak)
Antzuola 0 Gasteiz 10 (Neskak)

PILOTA

Gipuzkoako Txapelketa
Murumendi-Olalde (eskuz nag.) 21-22
Olalde-Andazpe (kadeteak) . . . 15-22
Olalde-Real Sociedad (paletaz) . 35-17


HERRITARREN HITZA/ Joseba Lezeta · Kazetaria

Ohitura berriak kale zaharretan

Buztinzurik itxita jarraitzen du eta oraindik aste batzuk beharko dituzte kale hori zabaltzeko. Baina kalea ireki eta gero ere, auto eta ibilgailu trafikoa ez da berdina izango gure kaleetan. Entseia balitz bezala hartu beharko genuke antzularrok itxialdi hau. Izan ere, lanak amaitzen dituztenean, autoarekin ibiltzeko ohitura berriak hartu beharko ditugu. Laster, Buztinzurin, Herriko Plazan eta Kalebarrenen ezingo da lehen bezala pasatu, batez ere oinezkoentzako kaleak bihurtuko direlako. Gainera, autoendako, norabide bakarra izango

dute, ziur aski, aipatutako kale hauek.

Horretarako, nola ez, irtenbideak, soluzioak, behar dira. Eta irtenbideak, hain zuzen ere, falta zaizkigu, bere osotasunean, behintzat. Txorikua etxea bota eta Sagasti auzoko bidea Kalegoirekin lotuta geratzen denean (aurrerago Antiguarekin), hura bihurtuko da herriko bide nagusia eta handik ibiliko gara, batik bat.



“Laster autoarekin ibiltzeko ohitura berriak hartu beharko ditugu”

oinez joanda.

Bestalde, Udalaren beste asmo bat da etorkizunean

Gaur egun ere, Herriko Plazaraino autoan sartu eta aparkalekurik ez dagoelako edozein modutan lagatzen dugu ibilgailua. Olanen etxeko eta eskola osteko aparkaleku berriak, aldiz, hutsik egoten dira. Ehun metro ere ez daude Herriko Plazatik aparkaleku horietara, minutu erdiko bidea

autobusak herriko kaleetatik ez igarotzea. Horretarako, hainbat irtenbide aztertzen dihardute Udalean, eta baliteke Antiguan eta Beheko Auzoan baino ez geratzea autobusa; hortaz, gaur egun Herriko Plazan dagoen autobus geralekua kendu egingo lukete. Hori bai, bi geraleku horietan markesinak egokituko dituzte. Aiherra kalean geralekua jarri eta autobusak handik pasatzea da beste aukera bat.

Buztinzuri kalea zabaltzen arren, geure burua arau berrietara prestatzen joan beharko dugu, borondate pixka batekin.

Zabalo Iturgintza S.L.
Bidea eginez

Tallerra: Uzarraga bidea, 10. Antzuola. Tf. 943 78 71 78
Erakusketa: Kalebarren, 1. Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haie egokitua
- Enpresen mantenimendua
- Lurrin instalazioak
- Bero-aurrezteak
- Bainugelak. Proiektuak momentuan DIBaren bidez
- Birgaitze-espeditentzarako bideratzen ditugu

EGAÑA

Era guztietako arotz lanak

Tarima eta parketa jartzea
Zoruen kutxilatua eta barnizatuak

Kalegoi 21, ANTZUOLA Tel.: 943 76 64 23